

Grad Novi Pazar

Skupština grada

Odbornička grupa SDA Sandžaka

Novi Pazar

15. maj 2021. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU INICIJATIVE ZA UTVRĐIVANJE NAČINA PRAZNOVANJA BOŠNJAČKIH NACIONALNIH PRAZNIKA**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja je zakazana za 17. maj 2021. godine.

Predsjednik odborničke grupe

Ahmedin Škrijelj

Na osnovu člana 20. stav 1. tačka 10. člana 79. stav 1. tačka 1. i 2. Zakona o lokalnoj samoupravi („Službeni glasnik RS“, broj 129/2007, 83/2014 – dr. zakon, 101/2016 – dr. zakon i 47/2018), člana 4. stav 1. Zakona o zaštiti prava i sloboda nacionalnih manjina ("Službeni list SRJ", br. 11/2002, "Sl. list SCG", br. 1/2003 - Ustavna povelja i "Službeni glasnik RS", br. 72/2009 - dr. zakon, 97/2013 - odluka US i 47/2018), člana 15. stav 1. tačka 25. i člana 147. Statuta grada Novog Pazara („Službeni list grada Novog Pazara“, broj 6/19) i člana 137. Poslovnika Skupštine grada Novog Pazara („Službeni list grada Novog Pazara“, broj 6/19), Skupština grada Novog Pazara na sjednici održanoj 17. maja 2021. godine, donosi

ODLUKU

O POKRETANJU INICIJATIVE ZA UTVRĐIVANJE NAČINA PRAZNOVANJA BOŠNJAČKIH NACIONALNIH PRAZNIKA

Član 1.

Skupština grada Novog Pazara, kao jednu od neravnopravnosti, konstatuje neravnopravnost pripadnika bošnjačkog naroda u pogledu ustanovljavanja i praznovanja nacionalnih i vjerskih praznika.

Član 2.

Skupština grada Novog Pazara zahijeva od državnih organa Republike Srbije preduzimanje adekvatnih mjera kao i donošenje novih ili izmjenu važećih zakona i drugih propisa i opštih akata u cilju otklanjanja konstatovane neravnopravnosti.

Član 3.

Skupština grada Novog Pazara zahtjeva od državnih organa Republike Srbije da se preduzimanjem mjera, donošenjem novih ili izmjenom važećih zakona i drugih propisa i opštih akata, pripadnicima bošnjačkog naroda osigura:

- potvrđivanje 28. septembra (Dan Bošnjaka) za bošnjački nacionalni praznik;
- da državni i drugi organi, javna preduzeća i ustanove, javne službe i druge javne institucije, u dane Ramazanskog i Kurban Bajrama, ne rade najmanje dva radna dana;
- da državni i drugi organi, javna preduzeća i ustanove, javne službe i druge javne institucije, ne rade za 11. maj – Dan bošnjačke nacionalne zastave i 20. novembar – Dan Sandžaka i druge potvrđene bošnjačke nacionalne praznike
- ukidanje nadoknađivanja nastave u obrazovnim ustanovama, koja se propusti zbog obilježavanja bošnjačkih nacionalnih praznika;

- da ako jedan od datuma kada se praznuju bošnjački nacionalni praznici padne u nedjelju, ne radi se prvog narednog radnog dana.

Član 4.

Ovu odluku dostaviti Narodnoj skupštini Republike Srbije i Vladi Republike Srbije.

Član 5.

Ovu odluku objaviti u „Službenom listu grada Novog Pazara“.

SKUPŠTINA GRADA NOVOG PAZARA

Broj:

U Novom Pazaru, _____. _____. 2020. godine

PREDSJEDNIK

Dr. Anela Šemsović

O B R A Z L O Ž E N J E:

Pravni osnov za donošenje odluke:

Članom 79. stav 1. tačka 1. i 2. Zakona o lokalnoj samoupravi propisano je, između ostalog, da organi i službe jedinice lokalne samouprave u vršenju svojih nadležnosti daju organima Republike inicijative za uređivanje odnosa od značaja za lokalnu samoupravu, kao i da podnose predstavke i daju prijedloge u pogledu postupanja organa Republike. Zakonom o lokalnoj samoupravi propisano je da se jedinica lokalne samouprave stara o stvarivanju ljudskih i manjinskih prava.

Članom 4. stav 1. Zakona o zaštiti prava i sloboda nacionalnih manjina propisano je da Organi vlasti u Republici Srbiji u skladu sa Ustavom i zakonom donose propise, pojedinačne pravne akte i preduzimaju mjere u cilju obezbjeđenja pune i efektivne ravnopravnosti između pripadnika nacionalnih manjina i građana koji pripadaju većini.

Statutom Grada Novog Pazara propisano je da se Grad Novi Pazar stara o ljudskim i manjinskim pravima (član 15. stav 1. tačka 25) kao i da Skupština grada Novog Pazara u vršenju svojih poslova, između ostalog, donosi i odluke (član 147.)

Članom 137. Poslovnika Skupštine grada Novog Pazara propisano je da Skupština donosi: odluku, program, plan, rešenje, zaključak, Poslovnik, deklaraciju, rezoluciju, preporuku, druge akte u skladu sa zakonom, Statutom i Poslovníkom.

Razlozi za donošenje odluke:

Polazeći od zakonom propisane obaveze koju Grad Novi Pazar ima u pogledu brige o ostvarivanju prava i položaju pripadnika bošnjačkog naroda i preduzimanju konkretnih mjera u to pravcu, a imajući u vidu da pitanje koje se tretira ovom Inicijativom još uvijek nije regulisano na način da se osigura puna ravnopravnost pripadnika bošnjačkog naroda sa većinskim srpskim narodom u pogledu načina praznovanja nacionalnih i vjerskih praznika, Skupština grada Novog Pazara donosi ovu odluku sa namjerom da utiče na donosiocima odluka da postupe na način predviđen ovom odlukom.

Činjenica da pitanje načina praznovanja nacionalnih i vjerskih praznika Bošnjaka i drugih brojčano manjih naroda nije uređeno zakonom ili drugim važećim propisom Republike Srbije, pred državne organe stavlja obavezu da to pitanje riješe u skladu sa interesima i potrebama bošnjačkog naroda.

Ova odluka jeste jedna od tačaka kako posutojeći državni sistem treba uskladiti sa potrebama bošnjačkog naroda.

Republika Srbija ima obavezu da donosi propise i preduzima mjere u cilju postizanja pune i efektivne ravnopravnosti između pripadnika nacionalnih manjina i građana koji pripadaju većini.

Ovim aktom traži se od državnih organa Republike Srbije da pripadnicima bošnjačkog naroda, kada je ova oblast u pitanju, osiguraju ostvarivanje pojedinih prava koja do sada nisu ostvarivali ili ih nisu mogli na adekvatan način ostvarivati.

Shodno naprijed navedenom na osnovu interesa i potreba bošnjačkog naroda državni organi Republike Srbije dužni su da:

- priznaju 28. septembar (Dan Bošnjaka) kao bošnjački nacionalni praznik;
- propišu obavezu državnim i drugim organima, javnim preduzećima i ustanovama, javnim službama i drugim javnim institucijama, da u dane Ramazanskog i Kurban Bajrama, ne rade najmanje dva radna dana;
- propišu obavezu državnim i drugim organima, javnim preduzećima i ustanovama, javnim službama i drugim javnim institucijama, da ne rade za 11. maj – Dan bošnjačke nacionalne zastave i 20. novembar – Dan Sandžaka i druge potvrđene bošnjačke nacionalne praznike
- ukinu obavezu nadoknađivanja nastave u obrazovnim ustanovama koja se propusti zbog obilježavanja bošnjačkih nacionalnih praznika;
- osiguraju da ako jedan od datuma kada se praznuju bošnjački nacionalni praznici padne u nedjelju, da se ne radi se prvog narednog radnog dana.

Objašnjenje pojedinačnih rješenja propisanih ovom odlukom

Član 1: Skupština grada konstatuje neravnopravnost bošnjačkog naroda sa većinskim srpskim narodom u oblasti ustanovljavanja i praznovanja bošnjačkih praznika.

Član 2: Ovim članom utvrđuje se obaveza državnih organa da preduzmu odgovarajuće mjere i donesu nove ili izmijene postojeće zakone i druge propise i opšte akte kako bi se neravnopravnost utvrđena u članu 1. ove odluke adekvatno otklonila.

Član 3: Propisane su konkretne mjere koje državni organi trebaju provesti u ovoj oblasti, odnosno oblasti ustanovljavanja i praznovanja nacionalnih i vjerskih praznika bošnjačkog naroda.

Član 4: Propisana je obaveza dostavljanja ove Odluke Narodnoj skupštini Republike Srbije i Vladi Republike Srbije.

Član 5: Propisana je obaveza objavljivanja u „Službenom listu grada Novog Pazara“.

Finansijska sredstva za sprovođenje ove odluke nisu potrebna.